

1472 *commendare . Deus Optimus Maximus tuos secundet successus : spero fore , ut tua unius virtute ingentes clades , quas christiano nomini immanissimus hostis intulit , brevi majore quodam barbarorum incommodo resarciantur .* Ad ea Mocenicus pauca de se , sed de Venetis magnifice multa est pollicitus : modo christiani Principes ii essent , qui ad id bellum conficiendum Venetas opes juvare vellent . Atque cum his Pontificis Legatus in Italiam , Venetus Neapolim Peloponnesiacam diversi abiere .

*Adolescens
eximia in-
dolis ar-
mamenta-
rium, quod
Callipoli e-
rat, noctu
incendit .*

Hic dum imperator muniendo oppido instat , Siculus adolescens (Antonio ajunt fuisse illi nomen) ad eum venit : fuerat is Chalcidica expugnatione captus : edocet exploratam se habere classem , quam subductam Othomanus Callipoli haberet : cum toto armamentario , quia noctu non asservaretur , facile concremari posse : ac si darentur sibi fidissimi comites , fore ut intra paucos dies audiret , a se nihil vani allatum . Exosculatus adolescentis indolem Venetus , magnis onerat pollicitationibus . Sociis & navigio comparatis , mox ille negociatorem mentitus , scapha pomis referta Dardanulos superat : inde quum Callipolim applicuisset , sordido quæstui per diem intentus (quando majus omnino facinus animo agitare) sequenti nocte armamentario cum centum navium apparatu incenso , in naves quæ proximo loco subductæ stabant , ob concursum hominum ad primam flammæ eruptionem factum , ignem injicere non potuit . Ipse Hellespontum trajicere studens , navi qua erat , ob ignem temere disjectum , incensa , in proximam sylvam concedere coactus est , ubi cum sociis in quam profundissimam potuit partem sese illatebravit : sed ubi poma fluitantia passim conspecta sunt , naviculaque proximo loco demersa , confestim rati quod erat , hesterni illius negociatoris opera id factum , ex fuga perfridie uno ex sociis perempto , qui non impune occubuit , retracti , ad Othomanum Siculus & reliqui sunt missi : a quo rogatus adolescens , qua sua injuria tantum facinus patrare esset ausus , ferociter & intrepide respondisse dicitur : *Communi christiani nominis hosti nocere voluisse : ag-*
gres-